

# **GALATAS**

## **Galacia probinsiacho**

## **creyicoqcunaman apostol Pablu**

## **cartaconqan**

Galacia probinsiaman chëcur Teyta Jesucristupaq Pablu willapäcuptionmi, Jesucristuta nunacuna chasquicuyarqan. Tsepitanam juc marcacunapana Pablu pasacorqan willacurnin. Tseyaqnam llutan yachatsicoqcuna Galacia probinsiacho quecaq creyicoqcunaman häcuriyarqan llutancunata yachatsicur. Tse yachatsicoqcunam tse creyicoqcunata queno malas obligayarqan: “Jesucristuman creyicurpis, presianmi costumbrintsic dia-cunata wardanantsic, (4.10) Moises escribishqan mandamientucunata cumplinantsic, (4.21) y compañonnintsiccho señalacunantsic” nir (6.12-13).

Asta Pablupaqpis “Manam apostoltsu” nirmi, tse yachatsicoqcuna nunacunata willapäyaq. Peru Pablutaqa manam imapis qocoqtsu tseno niyaptin. Pëqa mas yarpacacharqan Teyta Jesucristupaq rasonpa caqlata yachatsiquitam.

Tsemi Pablu que cartata escribircur apatserqan tse creyicoqcuna Jesucristupa alli willaquinillamanna marcäcur quecayänanpaq. “Porqui tsepita juc mas alli willaqueqa, manam cannatsu” nerqanmi. “Si pipis o noqapis o anjelpis, juclayapa Jesucristupa alli willaquininta willayapteqqa, Teyta Dios maldisyicayämätsun” nerqanmi (1.8-9).

*Pablupa saludaquinin*

<sup>1</sup> Noqa Pablutaqa, apostol canäpaq, manam juc nunatsu churamashqa, ni cachamashqa, sinoqa Teyta Jesucristum, y peta wanushqanpita cawariratsimoq Dios Yayam. <sup>2</sup> Noqam, llapan wauqintscicunawan Galacia marcacho quecaq creyicoqcunata saludayaq. <sup>3</sup> Dios Yayantsic y Teyta Jesucristuntsic yanapecuyäshü alli quenincho, alli pasaquicho cawacuyänequipaq. <sup>4</sup> Teyta Jesucristum alli queninwan jutsantsiccunarecur wanorqon Dios Yayantsic dispunishqanmanno, que patsacho mana alli yarpentscicunapita libramänantsicpaq. <sup>5</sup> ¡Diosnintsicta llapantsic imeyaqpis alabashun! ¡Tseno catsun! ¡Amen!

*Juclaya yachatsiquita ama chasquiyanquitsu*

<sup>6</sup> Jesucristupa alli queninrecurllanam qamcunaqa acrashqa cayanqui. ¿Y tseta qonqaquicurcu juclaya willaquimanna creyiquicayanqui! Tsemi tseta musyarir imano quetapis pueditsu. <sup>7</sup> Tse willacuyanqanqa manam rasonpa caq alli willaquito. Sinoqa tse yachatsicoqcunam Jesucristupa alli willaquininta mana alliman ticraratsir pantatsiquicayäshunqui. <sup>8</sup> Sitsun pipis willayanqaq rasonpa alli willaquito juclayaman ticraratsir, yachatsiyäshunqui; tseno yachatsicoqtaqa Dios urusninyaq maldisicutsun, noqata car o anjelta carpis. <sup>9</sup> Tseno cananpaq caqtaqa puntatanam willayarqaq, jina cananpis cuticuryanmi niyaq: Sitsun pipis Teyta Jesucristupa rasonpa alli willaquinin willapäyanqaqta juclayaman ticraratsir

willapäyäshunqui, Diospa maldisiunninmi pecuñata ratanqa.

**10** Quecunataqa niriyaq manam nunacunawan alicho quedeta munartsu; sinoqa Dioswan alicho quedeta munarmi. Manam ni ima qocamantsu nunacuna mana allipa ricayäaptinpis. Sitsun noqa nunacunawan alicho quedeta munäman, manachi Teyta Jesucristupa sirweqnintsu cäman.

*Quiquin Teyta Jesucristum Pablutaqa churaran apostolnin cananpaq*

**11** Wauqicuna y panicuna, queta niriyahqe qui musyayänequipaq: Teyta Jesuspa alli willaquinin willayanqaqqa manam ni pi nunacunapa yarpeninllapitatsu cashqa. **12** Ni manam meqan nunacunatsu yachatsimashqa; sinoqa quiquin Teyta Jesucristum rebelamarni käyitsimashqa.

**13** Qamcuna wiyyashqachi yä cayanqui puntata israel nunacunapa costumbircunaman marcäcurnin, imano portacunqäta. Tsemi Teyta Jesusman creyicoqcunata pasepa ushacätsita munarnin, chiquir qaticacharqä. **14** Wine mayicunapitapis costumbircunata masmi cumplita tiraq cä. Tsemi awilucunapa costumbircunata jucllellatapis mana qonqashpa cumpleq cä.

**15** Tseno quecaptimi, Dios alli queninrecur qayecamarqan. Mä mamäpa pachanllachoraq quecaptimi acramashqana canaq. **16** Tse qayamarmi, käyitsimarqan tsurin Jesucristupa alli willaquininta mana israel caq nunacunata willapänäpaq. Tseno rebelasionta chasquirir, manam pimanpis nunacunamantsu tapucoq

ewarqä. <sup>17</sup> Ni manam noqapita mas puntata acrashqa apostolcunamantsu Jerusalenta tapucoq ewarqä. Antis Arabia nishqan marcamanmi eucorqä. Tsepitaran Damasco marcamanpis cuterqä.

<sup>18</sup> Quima watataran Jerusalenman cuterqä, apostol Pedruta reqinäpaq. Pewanmi ishque semana täcuriyarqä. <sup>19</sup> Tsecho tarerqä Teyta Jesucristupa wauqin Santiagullatam; peru manam waquin apostolcunawanqa topayarqätsu. <sup>20</sup> Tseta que cartächo willayarniqui, manam uliquicätsu y Diosmi musyan rasonpa caqta escribicamonqäta.

<sup>21</sup> Jerusalenpitanam Siriaman y Ciliciaman eucorqä.\* <sup>22</sup> Judea marcacho Jesucristuman creyicoq wauqintsiccuna y panintsiccunaqa llapan inglisiacunacho manam ni meqan reqiyämarqantsu.† <sup>23</sup> Sinoqa wiyyashqanash cayänaq queno parlayaqta: “Teyta Jesusman creyicoqcunata ushacätsita munar qaticachaq nunash, cananqa, Jesuspa alli willaquinintana willacur purican” neqta. <sup>24</sup> Tseta musyecurninmi noqarecur Diosta alabayarqan.

## 2

<sup>1</sup> Tsepita chunca chuscu (14) watataran Jerusalenman yape cuterqä Bernabeta y Tituta pusharcur. <sup>2</sup> Tsemanqa ewarqä Dios ewanäpaq rebelamashqa captinmi. Tsechomi respetashqa

---

\* <sup>1:21</sup> Cilicia probinsiachomi carqan Pablupa marcan Tarsu (Hch 9.30). Siria probinsiachonam carqan Antioquia marca (Hch 11.25, 26). † <sup>1:22</sup> Judea probinsiachoqa Jerusalenmi carqan.

caq apostolcunallawan quiquiūcuna puralla juntaquecur, mana israel caq nunacunatapis alli willaquito willapanqäta willarqä “¿Allitacu o mana allitacu rurecä?” nirnin. <sup>3-4</sup>Tse parlacuyanqäman uli creyicoqcuna rataquillapa yecayämushqa cayaptinpis, manam pushayanqä Tituta mana israel nuna quecaptinpis, obligayarqantsu señalacunanaq. Peru tse uli creyicoqcunaqa Jesucristurecur librina quecashqantsicta despresyarmi, munayan yape Moisespa leyninpa esclabuno canantsictaran. <sup>5</sup>Peru noqacuna manam ni ichicllapis pecuna munayanqanta rurayarqätsu, porqui munayarqä rasonpa caq alli willaquiman creyicuyanqeiquillacho alli tsaracuyänequitam.

<sup>6</sup> Peru presisaq caq apostolcunaqa manam yachatsiconqäpita juclayata yachatsicunäpaq niyämarqantsu. (Aunqui noqapita mas presisaq apostol cayanqanqa manam imanantsu, porqui Diosqa llapantsictapis iwalmi ricamantsic.) <sup>7</sup>Antis cuentatam qocuriyarqan, mana israel nunacunaman Jesucristupa alli willaquninta willacunäpaq Dios cachamashqanta, y Pedrutana Israel caqcunaman willapäcunanaq cachashqanta. <sup>8</sup>Imanomi israel nunacunapa apostolnín cananpaq Pedruta Dios churarqan, tsenollam noqatapis mana israel caq nunacunapa apostolnín canäpaq churamashqqa. <sup>9</sup>Tseno canäpaq Dios yachení qomashqantam Jesusman creyicoqcunapa mandacoqnincuna Santiagu, Pedru y Juan, cuentata qocuriyarqan. Tsemi noqatawan Bernabeta taqlaparayämarqan noqacunawan acuerdu carnin. Tsenomi

parlariyarqä pecuna Israel caqcunata willapäcuyänanpaq y noqacunana mana israel caqcunaman willapäcoq eucuyänäpaq. <sup>10</sup> Unicoqa niyämarqan mana qonzellata wactsacunata yanapayänäpaqmi. Peru tsetaqa unepita patsanam rurarqä.

*Pablu apostol Pedruta piñapan Antioquiacho*

<sup>11</sup> Tsepitanam quecanqä Antioquia marcaman apostol Pedru shamuptin, piñapäcacharcorgä mana allita ruranqanpita. <sup>12</sup> Quenomi tse carqan: Santiagu cachamushqan nunacuna manaraq chäyämuptenqa, mana israel caq creyicoqcunawanmi apostol Pedru juntu juntu micurnin cayarqan. Peru chärayämuptinnam, señalaquipaqraq ecsijicoq nunacunata mantsacurnin, ichicllapa ichicllapa waqtsacürir munarqannatsu mana israel caqcunawan juntaquita. <sup>13</sup> Y waquin israel creyicoqcunapis peta qatirmi dosmanos ticracuriyarqan. Y asta Bernabepis pecunano portacurmi qallaquicorqan. <sup>14</sup> Tsemi rasonpa alli willaqui nenganmanno mana portacuptin, llapanpa nopancho queno Pedruta nerqä: “Israel nuna quecarpis, mana israel nunacunani cawecanqui. Cananqa ¿Imanirtaq tse mana israel caqcuna israel nunacunapa costumbrintsiccunataraq cumpliyänanta munanqui!” nir.

*Marcäquinintsicrecurlam Diosqa allitano  
ricamantsic*

<sup>15</sup> Noqantsicqa yuriquinintsicpita patsam israel nuna cantsic, y manam “Jutsasapa” nenqantsic, mana israel nunacunanotsu. <sup>16</sup> Tseno quecarpis,

musyantsicmi leynintsiccunata cumplita türarpis, Diospaqqa mana alliraq canqantsicta, peru Teyta Jesusllaman marcäcushqam siqa allitano ricamäshun. Tsemi noqantsictapis leyuncunata cumplenqantsicrecurve Diosnintsic allipa ricamäshun, sinoqa Jesucristuman marcäcushqallam. Porqui manam pitapis leyuncunata cumplenqanrecurllaqa allitano Diosnintsic chasquenqatsu.

<sup>17</sup> Sitsun Jesucristurecurllana Diosnintsic allitano ricamänantsicta türantsic, y cuentata qocurintsic jutsasaparaq quecanqantsicta. Tsepenqa ¿Jesucristucu jutsasapata ruraramantsic? ¡Manam tsenotsu! <sup>18</sup> Antis noqa imatapis ushacäratsir yape sharcatserqa, quiquiri jutsayoq cä. <sup>19</sup> Leyuncunarecurmi wanushqa cuenta quecä, y mananam tse leyuncunata cumplinäpaq yarpacachänatsu; sinoqa Diosllapaq cawacunäpaqmi yarpacachécä. <sup>20</sup> Noqaqa Teyta Jesucristuwan cruscho juntu wanushqa cuentam quecä, y manam quiquiri munanqänonatsu cawä, sinoqa Jesucristu munanqannonam. Tsemi que patsacho cawecarqa, Diospa tsurinman marcäcurlana cawacü. Pemi allapa cuyamarni rantü wanorqan. <sup>21</sup> Noqaqa manam mana baleqpaqnatsu churä Diospa alli queninta. Sitsun leynintsiccunata cumplishqaraq alli ruraqtano Dios chasquimashwan carqan; tseno captenqa, Jesucristu wanonqan manachi balinmantu.

### 3

*Teyta    Jesusllaman    creyicuyaptin    Dios*

*cachamun Santu Espiritunta*

<sup>1</sup> Galacia marcacho täraqcuna, ¡Imano upataq ticulariyarqonqui! ¿Pitaq yachatsiyäshorqonqui engañayäshurniqui? Noqacunaqa clarum yachatsiyarqaq Jesucristu qamcunarecur cruscho wanushqanta. <sup>2</sup> Tsemi queta tapuriyeniquita munä: ¿Diospa Santu Espiritunta chasquiyarqonqui leycunata cumpliyanquequirecurcu, o Jesucristuman creyicuyänequipaq willapäyanqaqman marcäcurllacu! <sup>3</sup> ¡Qamcuna imano upataq cayanqui! ¡Santu Espirituman marcäquicarnin, quiquipuicunapa rureniquicunaman marcäcur qallaquicuyänequipaq! <sup>4</sup> ¿Manacu yarpäyanqui allapa sufrimientucunata pasayanquequita! ¿Tseta me cuchumantaq churariyarqonqui! ¡Ojala tseno sufriyanquequi ama embanoga canmantsu! <sup>5</sup> ¡Masqui cuentata qocuyë! ¿Imanirtaq Dios Santu Espiritunta qoyäshorqonqui? ¿Y imanirtaq qamcunacho espantepaq milagrunta ruran: Moisespa leyinincunata cumpliyanquequirecurcu o Jesusman marcäcuyanquequirecurllacu?

*Marcäquininrecurllam Abrahamta Dios jutsannaqta chasquerqan*

<sup>6</sup> Tsenollam “Abrahampis marcäcorqan Diosman, y marcäconqarecurllam alli ruraqtano ricarqan.”\* <sup>7</sup> Tsemi queta musyayë: Diosman marcäcoqcunallam Abrahampa mirenin cuentaqa cayan. <sup>8</sup> Diospa palabrandomí unepita patsa cäyitsimantsic marcäcoqcunataqa israel nunacunata o mana israel nunacunatapis Diosnintsic

---

\* **3:6** Gn 15.6

allitano chasquenqanta. Tsemi Abrahamta alli willaquita queno willarqan: “Qamrecurmi enteru munducho nunacunapis bendisishqa cayanqa”\* nir. <sup>9</sup> Tsemi llapan nunacunatapis Abrahamno marcäcoq caqtaqa Abrahamtano bendisiconqa.

<sup>10</sup> Moisespa leynincunallata cumplita munaq caq nunacunapaqqa condenashqa cayänanpaqmi Diospa palabrancho queno nican: “Escribishqa leycunata jucllellatapis mana cumpleq caqtaqa; Diosmi urusninyaq maldisiconqa”\* nir. <sup>11</sup> Tsemi musyantsic pipis ley nenqancunata cumplirllaqa Diospa nopancho mana alli canqanta. Porqui palabrandomi queno escribirëcan: “Alli nunacunaqa marcäquininrecurmi salbaconqa”\* nir. <sup>12</sup> Peru leycunaqa manam marcäquipaq parlantsu; sinoqa “Leycunata cumpleq nunam salbaconqaqa”\* ninmi. <sup>13</sup> Ley nenqanmanno urusnintsicyaq mana maldisiushqa canantsicpaqmi noqantsicpa rantintsic Teyta Jesucristu wanurerqan. Y Diospa palabrandomi queno escribirëcan: “Meqan nunapis quericho warcuraqqqa urusninyaq maldisiushqam quecan”\* nishpa. <sup>14</sup> Tsenoqa wanorqan Abrahamta Diosnintsic änenganno mana israel caq nunacunapis bendisionta Jesucristurecur chasquiyänanpaqmi. Tsenoqam Diosnintsic änimasqantsic Santu Espirituta marcäquinintsicrecurlana llapantsic chasquirintsic.

---

\* **3:8** Gn 12.3 \* **3:10** Dt 27.26 \* **3:11** Hab 2.4; Ro 1.17 \* **3:12**  
Lv 18.5 \* **3:13** Dt 21.23

*Marcäquinintsicrecurllam salbasionta tarintsic*

<sup>15</sup> Wauqicuna panicuna, juc iwalatsiquiwan yacharatsiyashqequei: Juc nuna piwanpis contratuta ruracushqanmanqa, manam pipis imatapis yapanmantsu, ni mana baleqpaq churanmantsu. <sup>16</sup> Tsenollam Diospis Abrahamta änerqan mireninta bendisinanpaq. Y manam atscaqpaqtsu “Mireniquicunatam bendisishaq” nerqan, sinoqa juc mireninllapaqmi\* parlan, y tseqa Jesucristum. <sup>17</sup> Tsemi niyaq: Diospis Abrahamta änir contratuta ruranqanta, manam mana caqpaqqa churarqantsu, ni manam Moises escribishqan leypis ushacätsita puedintsu, porqui tse leytaqa escribiyashqapis qepataran chuscu pachac quima chunca (430) wata pasacäcushqachoran. <sup>18</sup> Sitsun leynintsiccunata cäsucurraq Dios änicushqan erensiata chasquishwan carqan, tseqa manachi äanimashqantsicpitatsu chasquishwan carqan. Peru Diosqa Abrahamta änenqanta qorqan alli queninrecurllam.

<sup>19</sup> Tsepenga ¿Imallapaqnataq sirwin leycuna? Leycunataqa qepataran escribiyashqa jutsasapa canqantsicrecurr, asta Abrahampa mireninpita Dios änicushqan chämonganyaq. Tse leycunataqa anjelnincunallatawanmi willacamoqninta qotserqan. <sup>20</sup> Peru quiquin Diosqa jucllella carmi, änicur manana willacamoqta wanarqantsu.\*

*Leycuna imapaqpis cashqan*

---

\* **3:16** Gn 12.7      \* **3:20** Abrahamtaqa quiquin Teyta Diosmi yanapananpaq änirnin, parlaparqan manam juc anjeltawantsu, ni juc willacoqtawantsu änerqan.

**21** Tseno niriyapteq paqtam pensacurcuyanquiman: “¿Tsepenqa Dios änicushqanpa contranchileycunaqa?” nirnin. ¡Manam tsenotsu! Sitsun leycunata cumplirlla, salbacurishwan carqan; tseno captenqa, leycunata cumplishqallachi Diosnintsic alli ruraqta tictratsimarnintsic allipa ricamashwan carqan. **22** Peru Diospa palabranmi musyatsimantsic llapan nunacuna carselcho cuenta jutsallacho cawaquicanqantsicta. Tsenopam musyatsimantsic Jesucristuman marcäcoqcunalla Diospa änicushqanta chasquiyanqanta.

**23** Peru peman manaraq marcäcushqaqa, leycunam carselcho llawiraq cuentata catsimarcqontsic. Tsenomi shuyecarqantsic marcäqui chäramunanta. **24** Tse leycunaqa, imeca juc wamrata pipis pushaq cuentam, pushamarqontsic Jesucristuman, peman marcäcushqalla allitanona Diosnintsic chasquimänantsicpaq.

**25** Peru canan Jesucristuman marcäcurerqa, mananam tse pushacoq leyta wanantsicnatsu.

**26** Sinoqa Jesucristuman marcäcurlanam, cananqa Diospa wamrancunana llapequipis cayanqui.

**27** Y Jesucristuman creyir bautisacurirmi, pewan jucnolla tictrariyarqonqui. **28** Tseno creyicushqa carninmi, Jesucristucho jucnollana llapequicuna quecayanqui, israel nuna car o mana israel nuna carpis, esclabu car o mana esclabu carpis, ollqu carpis o warmi carpis.

**29** Teyta Jesuswan jucnolla cayanquequirecurmi, Abrahampa castancunana tictrariyarqonqui. Y tsemi Abrahamno Diosnintsic änishqanta chasquiyänequipaq erederuna cayanqui.

**4***Diospa tsurinnam cantsic*

<sup>1</sup> Wauqicuna panicuna, noqam munä quenopa cäyitsiyeniquita: Juc nunapa tsurin pishiraq carqa, aunqui papäninpa erensianwan dueñu cananpaq quecarpis, papäninpa esclabuncunanollaran quecan. <sup>2</sup> Erensianta papänin qonan junaqyaqmi wätaqnin tse wamrata yachatsir shumaq cuidan. <sup>3</sup> Tsenomi noqantsicpis pishi wamra cuenta puntataqa une costumbrintsiccunata Diostano mantsacur cacorqontsic. <sup>4</sup> Y sitanqan tiempu chäramuptinnam, Diosnintsic tsurin Jesucristuta que patsaman cachamorgan juc warmicho yuricurir leycunata cäsucur winananpaq. <sup>5</sup> Tsenopam leyaintsicpa mandaduncho caquicashqa libraramarqontsic tsurintanona Diosnintic chasquimänapaq.

<sup>6</sup> Y tsenam tsurin cashqana, Tsurin Jesucristupa Santu Espiritunta shonquntsicman Dios cachamuptin queno parlatsimantsic: “¡Diosllä, cananqa qammi Papällä canqui!” nir. <sup>7</sup> Y cananqa Diospa tsurincunam cantsic. Y manam esclabu cuentanonatsu; sinoqa Diospa tsurin carninmi, Jesucristurecur, Diosnintsic änicushqan erensiata chasquishun.

<sup>8</sup> Qamcunaqa Diosninticta manaraq reqirninmi, costumbriquicunamanno mana rasonpa caq dioscunata sirwiyarquequi. <sup>9</sup> Cananqa Diosnintictanam reqiriyanqonqui, o mas claru niyashquequi, quiquin Diosninticmi reqiyäshurniqui, acrayäshorqonqui. Tseno quecaptin, ¿Imanirtan mana imapaqpis sirweq

costumbriquicunata qatita munayanqui, esclabu cuentano yape cayänequipaq! <sup>10</sup> Qamcunaqa sumatsicuyanqan junaqcunatam, quillacunatam, watacunatam y dia wardacunatam cumpliyänequipaq yarpacachar caquicayanqui. <sup>11</sup> Allapam llaqui yachatsiyanqaqcuna mana imapaqpis sirwiyäshonqeiqua yarparnin.

*Pablu allapa llaquishpa escribin mana alli yachatsicoqcunapaq*

<sup>12</sup> Wauqicuna y panicuna, qamcunapis noqano portacuyë. Porqui noqapis qamcunacho quecar, qamcunanollam portacorqä.\* Y manam imachopis ofendiyämarqequisu.

<sup>13</sup> Musyayanquequinopis qeshyanqärecurmí Teyta Jesuspa alli willaquininta primera bes qamcunaman chätsimorqä. <sup>14</sup> Y noqa qeshyaquicaptipis qamcuna manam ni ichicllapis chiquiyämarqequisu ni melanayämarqequisu. Antis noqata allapa cuyayämarnümi, Diosnintscipita shamushqa anjeltano y quiquin Teyta Jesucristutano chasquiyämarqeui. <sup>15</sup> Rasonpa caqllatam niyaq. Nawiquicuna jorquna captenqa jorquricurchi qoycayämanquiman carqan. Y cananqa ¿tse cushiquiniquicunata me cuchumantan churecuyarqonqui? <sup>16</sup> ¿Cananqa rasonpa caqta niriyanaqrecurso noqapa conträ ticracuriyanqui!

<sup>17</sup> Tse nunacunaqa noqacunapita raquicacuriyänequipaqmi arde shumaq inquitecayäshunqui. Y munayan pecunata qatiyänequitam.

---

\* **4:12** Israel nuna quecarpis costumbricunata jaqirirnin Pablu pecunano ticrarqan.

**18** Änirpis, waquincunata inquiteqa allim, peru alli intereswan imepis catsun y ama noqa quecaptillaqa. **19** Ijücuna, imeca qeshyaq warmi qeshpicunan öra nanatsiconqannomi, allapa qamcunapaq yape shonqücho nanatsicü, Teyta Jesucristullawan waran waran juc shonqunolla cacuyänequita munar. **20** ¡Imanolllaraq qamcunapa nopequicunacho quiqui ricacaramüman shumaq juclaya parlapécuyänaapqa!      ¡Qamcunarecurmi imano quetapis puedinatsu!

*Pablu yarpätsin Teyta Jesuscho librina cayan-qanta*

**21** Israel nunacunapa costumbrincunata cumplita munaqcuna, queta tapuriyashqe qui: ¿Allicu cäiyianqui Moises escribishqan leycunata, o manacu! **22** Diospa palabranmi willamantsic une Abrahampa ishcaq tsurin cashqanta. Juc caqmi wätenin warmicho y jucninnam lejitimur warmincho carqan. **23** Tse esclabun warmicho yuricoq wamraqa Abrahampa muneninllapitam carqan, peru mana esclabu caq warmincho wamraqa Diosnintsic Abrahamta änishqanmannomi yuricorqan. **24** Que ishcan warmicunapaq tincutsiquiwan willayarniquim cäyiratsiyaq Dios ishque contratuta rurashqanta. Jucnín contratutam Sinai jircacho rurarqan. Tseqa iwalan Agarpa llapan sirwipacoq mireninwanmi. **25** Agarmi iwalan Arabiacho quecaq Sinai jircawan, y canan Jerusalen marcawan.      Porqui pecunaqa esclabu

cuentallaran llapanpis caquicayan.<sup>†</sup> **26** Peru sielu caq Jerusalenqa librinam. Manam esclabunatsu y noqantsicmi pepita yurishqa wamra cuenta quecantsic. **27** Porqui Diospa palabranmi queno escribirëcan:

“¡Qolloq warmi, cushiqui!

¡Qam, mana imepis qeshpicoq warmi,  
canan cushiquiwan qayariquï!

Jaqirishqa warmim, qowayoq warmipitapis  
mas atsca wawayoq canqa”<sup>‡</sup> nir.

**28** Tsemi wauqicuna panicuna, noqantsicqa Isaac cuenta Diospa änicushqan wamrancunana quecantsic. **29** Imanomi une tiempupis nunapa muneninllapita yureq wamra, Santu Espiritupa muneninpita yuricoq caq wamrata chiquerqan; tsenollam cananpis noqantsiccho pasacun.<sup>§</sup>

**30** Peru Diospa palabranmi queno nican: “Esclabequita wawantawan qarquriquï. Porqui tse esclabupa wawan manam combiennintsu mana esclabu caq warmiquipa wawanwan erensiata raquinacunan”\* nir. **31** Wauqicuna panicuna, noqantsicqa manam esclabu warmipa wawannotsu cantsic, sinoqa libri warmipa wawan cuentam cantsic.\*

---

<sup>†</sup> **4:25** Israel nunacunaqa esclabu cuentam cayarqan Moises esribishqan leycunata cumpliyänanpaq. <sup>‡</sup> **4:27** Is 54.1. Pablu quecho parlecan atscaq creyicoqcuna israel nunapis o mana israel nunapis miracäyänanpaq caqtam. <sup>§</sup> **4:29** Jesucristuman marcäcoqcunaqa änicushqanno yurishqa cuentam, y ley cumpli munaqcuna jitapuquillapita yurishqa cuentam cayan. \* **4:30** Gn 21.10   \* **4:31** Israel nunacunam costumbrincunata qatirnin, iwalayan esclabu warmipa wawanwan, peru Teyta Jesusman creyicoqcunaqa Diospa tsurincunana carmi librina cayan.

## 5

*Une costumbricunata jaqirir, Teyta Jesusman  
creyicur librina cantsic*

<sup>1</sup> Teyta Jesucristum salbamashqantsic leypita librina canapaq. Tsemi alli firmi tsaracuyé, y amana yape yuguta apaqno esclabu cayënatsu.

<sup>2</sup> Wauqicuna, panicuna, noqa Pablu que niyanqaqta cäyicayämë. Sitsun qamcuna señalacuyanqui; tseno cayaptiqueqa, Teyta Jesucristu manam qamcunapaq balintsu.

<sup>3</sup> Yapemi willayaq: Sitsun señalacushqa quetaraq munayanqui, tseno captenqa leytam llapanta cumpliyännequi. <sup>4</sup> Sitsun waquincuna creyiyanqa tse leycunata qatiyanqanrecur allitano Dios chasquiyänanta; tsepenqa Teyta Jesusman creyicuyanqan manam imapaq balintsu. Tsemi Diosnintsicpa alli queninpita waqtsacäcuriyarqon.

<sup>5</sup> Y noqantsictaqa Santu Espiritum poderninwan yanapamantsic marcäquinintsicrecurlana pe allitano ricamänantsicpaq caqta musyanantsicpaq.

<sup>6</sup> Y Teyta Jesucristuwan jucnolla caqcunapaqqqa manam imanantsu señalaconqantsic o mana señalaconqantsic. Pepa munenenqa peman marcäcurlana, cuyanacur cawaquimi.

<sup>7</sup> Teyta Jesucristuman creyicurerqa, allapa firmim cayarquequi. Y cananqa ¿pitán engañayäshorqonqui rasonpa caqman creyiquicayanquequita jaqiriyännequipaq?

<sup>8</sup> Qayayäshoqníqui Diostsu manam yachat-siyäshorqonqui rasonpa caqta jaqiriyännequipaq.

<sup>9</sup> Ichiclla lebaduram masata poquratsin.\* <sup>10</sup> Peru Teytantsicman marcäconqantsicrecurmi noqa musyä juclayapa mana pensacurcuyänequita. Tse mana alli yachatsicoqcunataqa, pi captinpis, Dios castiganqam.

<sup>11</sup> Wauqicuna, panicuna, cäiyämë. Sitsun “Señalacuyanquiran” nishpa, yachat-siyaqman carqan, tseqa manachi chiquir qaticachäyämanmansu. Tseno captenqa, Teyta Jesus cruscho wanonqanta yachatsiconqä manachi pitapis piñatsinmansu. <sup>12</sup> Sitsun tse nunacuna ecsijiyäshunqui señalacuyänequipaq, quiquinuncunapata limpupis roquriyätsun.

### *Santu Espiritu munanqanno cawashun*

<sup>13</sup> Wauqicuna, panicuna, librina cayänequipaqmi, Dios qayayäshorqonqui. Peru cuidädu “Librinam quecä” nir, etsequicunapa munenincunata ruraquicayanquiman. Antis yarpacachäyë jucniqui jucniquicuna cuyanacurnin yanapanacuyänequipaq. <sup>14</sup> Moises escribishqan llapan leymi juc palabralla-chona queno nimantsic: “Quiquipaq yarpacachanqequinolla, nuna mayiquicunapaqpis yarpacachäyanqui”\* nir. <sup>15</sup> Sitsun qamcuna quiquipaq curna pura jaqchinacur pelyar micunacur cacuyanqui; tseno cacurnenqa, paqtataq waqtsacar ushacäriyanquiman.

<sup>16</sup> Tsemi niyaq: Santu Espiritu yachat-siyäshuptiqui, pepa muneninta rurayë. Tsenam

\* <sup>5:9</sup> Ichiclla lebaradura masata atscaman miratseqnomi tse yachatsicoqcuna atsca nunacunapa caweninta llutanman apecan.

\* <sup>5:14</sup> Lv 19.18

quiquipicunapa mana alli muneniquicunatapis rurayanquinatsu. <sup>17</sup> Mana alli muneniquicunam Santu Espiritupa contran. Y Santu Espiritunam mana alli muneniquicunapa contran. Tsemi mana cäyinacuyaptin, pue diyanquitsu imatapis munayanqe quimanno rureta. <sup>18</sup> Sitsun qamcuna Santu Espiritupa muneninllata rurayanquiman, mananam leycunapa mandadunchonatsu cayanquiman.

<sup>19</sup> Mana alli munenincunata ruraqcunaqa cawayan quenomi: Ollqupis warmipis casadu quecarmi o japallancuna quecarmi, jucwan jucwan yachacuyan; y tuquilaya melanepaq mana alli munenincunatam rurayan. <sup>20</sup> Imajincunatam adorayan, y brujanacuyanmi, chiquinacuyanmi, pletunacuyanmi, y codisiosum, y allapa ichicllapaqmi cayan, allapam piñacuyan, liriyacuyanmi, nunacunatam bullatsir grupu grupuman raquicatsiyan. <sup>21</sup> Y nuna mayincunapa imanpis cayäpuptinmi waqapucuyan, asesinum cayan, machacuyanmi. Fiestachomi melanayanqanyaq micur, upyar mana allicunata rurayan. Y puntata willayanqaqnomi cananpis yape cäyiratsiyaq: Dios mandaconqan marcaman tse ruraq nunacuna manam häyanqatsu.

<sup>22</sup> Peru Santu Espirituyoqcunaqa cuyanacuyanmi. Cushi cushim cawacuyan. Alli pasaqui chomi cawayan. Allapa pasensiacoqmi cayan. Alli shonquyoqmi cayan. Juclaya nunam cayan, änlicushqantapis cumpliyanmi, <sup>23</sup> y umildim cayan, y peqancunatapis alli tsaräcoqmi cayan. Tseno portacuyaptenqa, leycunapis

manam condenannatsu. <sup>24</sup> Teyta Jesusman creyicushqa caqcunaqa cruscho clabarëcaqno carmi, mana alli munenincunata manana rurayannatsu. <sup>25</sup> Sitsun Santu Espiritu juclaya cawaquita qoycamantsic pe munanqannonna cawacushun. <sup>26</sup> Ama quiquintsictäqa imachopis alabacushuntsu, ni quiquintsic pura embidiosu carnin chiquinacushuntsu.

## 6

### *Nuna mayintsiccunawan yanapanacushun*

<sup>1</sup> Wauqicuna panicuna, waquincunata mana alli rureman ishquishqata ricarnenqa, Santu Espiritupa munenincho quecaqcuna shumaq mana penqapashpa willapécuyé mana yape rurananpaq. Y ipaqtam penqapäyanqequivich quiquiquicunapis pe ruranqanman ishquiyanquiman! <sup>2</sup> Jina jucníqui jucníquicuna imallachopis yanapanacuyé. Tseta rurarninmi, Teyta Jesucristu mandacushqancunata rurayanqui.

<sup>3</sup> Pipis, mana ima quecar, nuna tucorqa quiquinllam engañacun. <sup>4</sup> Antis quiquintsicmi shonquntsicta tapushwan allita o mana allita rurecanqantsicta. Waquin nunacunapita mas alli canqantsicta alabaconqantsicqa manam imapaqpis balintsu. Antis allicunata ruranqantsictaqa shonquntsicllachomi cushicushwan. <sup>5</sup> Porqui cada unu portaquinintsicmanpam Teyta Diosta cuentata qoshun.

<sup>6</sup> Y Diospa palabranta yachatsiyäshonqequirecur tse yachatsicoqcunata imawanpis yanapayé.

<sup>7</sup> Ama quiquipuicuna engañacuyëtsu. Manam pueintsictsu Diospita burlaquita. Porqui llapan imatapis muronqantsictam cosechar ellushun. <sup>8</sup> Mana alli munenintsicta rurarqa, mana allita muroq cuentam quecantsic. Tsepitam cosechashun perditionta. Peru Santu Espiritupa muneninmanno cawacorqa wiñe cawaquitam tarishun. <sup>9</sup> Tserecur ama qelanäshuntsu allicuna rureta, y mana utinashpa rurarqa, tiempunchomi allita cosechashun. <sup>10</sup> Tsemi pueaqantsicmanno nuna mayintsiccunata yanapashun. Peru masqa yanapecushun Teyta Jesusman marcäcoq mayintsiccunata.

### *Pablu allibuenu notificacur despidicun*

<sup>11</sup> Y canan ricayë, que jatusaq letracunawan quiqui escribimonqäta. <sup>12</sup> Tse alli tucoqcunaqa nunacunawan alli quedeta munarllam, obligayäshunqui señalacuyänequipaq. Porqui manam munayantsu Jesucristurecur chiquishqa quetaqa. <sup>13</sup> Pecunaqa señalacushqa quecarninpis, manam leycunata llapantatsu cumplicayan. Asimi qamcunataqa obligayäshunqui señalacushqa cayänequipaq. Y cäsuriyaptiquinam, cushir alabacuyan. <sup>14</sup> Y noqaqa manam imapitapis alabacütsu. Unicoqa Teytantsic Jesucristu cruscho noqantsicpaqrecur wanonqanllatam cushicü. Y cananqa Teyta Jesus wanonqanrecurmi noqapaq ushacashqana mana alli rurecuna. Y mana allicunata manana ruranäpaqmi cruscho wanushqa cuentano noqapis quecä. <sup>15</sup> Teyta Jesucristuchoqa señalacushqa canqantsic, o mana señalacushqa canqantsicpis manam

ima imanannatsu. Sinoqa juclaya nunana ticrashqa canqantsicllam balin. <sup>16</sup> Tsenomanpa creyicoqcunata y Diospa rasonpa israel nunancunata\* pe ancupar yanapecuyäshii pewan shumaq pasaquicho cacuyänequipaq.

<sup>17</sup> Y cananpita witsepa ama ni pipis peqäta nanatsimutsuntsu. Porqui Jesucristurecur astayämanqan señalcunapis bastanam qarächo quecan.

<sup>18</sup> Wauqicuna y panicuna, Teytantsic Jesucristu alli queninwan llapequicunata ancupëcuyäshii. Tseno catsun.

---

\* **6:16** Diospa rasonpa israel nunancunaqa, rasonpa peman marcäcoqcunallam israel nuna car o mana israel nuna carpis.

**Teyta Diospa Mushoq Testamentun  
New Testament in Quechua, Huaylas Ancash  
(PE:qwh:Quechua, Huaylas Ancash)**

copyright © 2008 Wycliffe Bible Translators, Inc.

Language: Quechua, Huaylas Ancash

Translation by: Wycliffe Bible Translators, Inc.

Quechua, Huaylas Ancash [qwh], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Quechua, Huaylas Ancash

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

**2014-04-30**

---

**PDF generated using Haiola and XeLaTeX on 11 Nov 2022 from source files  
dated 29 Jan 2022  
d9dddd18-d974-546d-843a-95397527968f**